



Cuira, ils 25 d'october 2022

Communicaziun a las medias

## Plima d'aur/Pledpierla

Concurrenza da scriver per poetessas e fabulists

La Lia Rumantscha ha lantschà la concurrenza Plima d'aur/Pledpierla che ha lieu mintga dus onns en las valladas rumantschas. Scholaras e scholars fin la 6avla classa pon scriver davart il tema «superforzas». Il tema per giuvenils e giuvens creschids fin 25 onns è «7 minutas». Cun la concurrenza Plima d'aur/Pledpierla vul la Lia Rumantscha promover il plaschair da scriver rumantsch tar las generaziuns giuvnas. L'ultim termin per inoltrar ils texts è ils 31 da mars 2023.

La Lia Rumantscha envida scholaras e scholars e giuvens creschids da las trais regiuns Engiadina, Grischun Central e Surselva inclusivamain las scolas bilinguas da Cuira, Domat e Trin da sa participar a la concurrenza da scriver Plima d'aur/Pledpierla. Quest onn ha ella tshernì per scholaras e scholars da la 3. fin la 6avla classa il tema «superforzas». Il tema per giuvenils da la scola superiura e giuvens creschids è «7 minutas».

Uffants, giuvenils e giuvens creschids da 9 fin 25 onns pon inoltrar lur text en l'idiom u en rumantsch grischun. Ils texts na dastgan betg esser pli lungs che duas paginas A4 scrittas a maun u max. 3'000 segns (senza spazis). L'ultim termin per inoltrar ils texts è ils 31 da mars 2023. La premiaziun dals megliers texts ha lieu mesemna, ils 31 da matg 2023 en tuttas trais regiuns. L'avantmezdi da las 10.15 a las 11.00 ha lieu la premiaziun virtuala comunablamain per tut las regiuns. Durant la saira datti lura la surdada dals premis en in rom dign en mintga regiun. Ils texts premiads vegnan publitgads en differentas revistas, chalenders e medias rumantschas. Intginas victuras ed intgins victurs da mintga regiun han plinavant la pussaivladad da preleger lur text durant ils Dis da litteratura 2023 a Domat. La giuria sa cumpona dad auturas ed auturs, da persunas d'instrucziun e da schurnalistas e schurnalists.

La concurrenza da scriver Plima d'aur/Pledpierla ha lieu mintga dus onns e sa drizza a poetessas e fabulists da tuttas regiuns rumantschas. Ella unescha ozendi las duas concurrenzas da scriver iniziadas da lezzas uras da la Renania e l'Uniun dals Grischs.

Las modalitads en detagl chatt'ins sin: [www.curs.ch/per-rumantschs](http://www.curs.ch/per-rumantschs)